



**JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL**

Komunikadu Imprensa

Dili, 12 Fevreiro 2007

**TRIBUNAL KANSELA TIHA PRODUSAUN PROBAS TESTEMUÑA NIAN BA
SASIN Pe.GEOVANI,Cs IHA KAZU ROGERIO LOBATO,Cs**

Julgamentu ba arguidu Rogerio Tiago de Fatima Lobato,cs konaba kazu alegasaun fahe kilat ba populasaun sivil iha loron Segunda-Feira, 12 Fevreiro 2007 ne'ebe hahú iha tuku 9:40 otl dader ne'ebe tuir lolós tenkte apresenta sasin lobuk ida iha julgamentu Tribunal nian ne'e iha ikus Tribunal kansela tiha ho razaun ne'ebe la klaru.

Julgamentu ba dala ida ne'e tuir lolós Tribunal apresenta sasin Pe. Giovánio de Souza, sasin José Belo, sasin Júlio de Jesus, sasin Agio Pereira, sasin Agostinho da Conceição, sasin Casimiro Ramos, sasin Casimiro Freitas no sasin João dos Santos, tuir oráriu julgamentu ne'ebe tribunal konsiste tiha ona. Wainhira Tribunal liu husi Oficial Justisa hahú halo pasa revista ba sasin sira ne'ebe atu hato'o ninia depoimentu iha julgamentu judisial nia oin, hafoin sasin Tribunal la autoriza Pe. Giovánio de Souza hodi hato'o ninia depoimentus ho razaun ne'ebe la klaru.

Sasin Pe. Giovanio de Souza hato'o tiha ninia protesta ba oficial justisa ne'ebe lee ninia naran, Oficial Justisa ne'e dehan deit katak Padre só bele hato'o protesta ne'e diretamente ba juiz kiolektivu ne'ebe kompostu husi Ivo Nelson de Caires Rosa Batista, juiza Teresa do Rosario no juiz Antoninho Goncalves kuandu sira tama ona iha sala julgamentu judisial nian nia laran.

Julgamentu ba arguidu Rogerio Tiago Lobato,Cs ne'e mós komesa hahú. Oficial Justisa hahú bolu sasin Pe. Giovanio no sasin Julio de Jesus tama ba sala julgamentu laran atu bele rona desizaun konaba tanba sa maka parte husi Tribunal labele rona sira ninia depoimentus? Hafoin de rona tiha razaun sira juiz, prokurador no advogadu sira hato'o ba Tribunal hafoin tuir mai sasin Julio de Jesus sai kedan husi sala julgamentu nian. Maibe sasin Pe. Giovanio de Souza sei hamriik nafatin iha sala julgamentu laran tanba sente katak husi parte tribunal halo manipulasaun ba ninia-an. Akontese mós iha sala julgamentu laran ne'e deskoti entre Pe.Giovanio no juiz Ivo.

Juiz Ivo esplika katak tuir prinsipiu parte tribunal sei rona sasin hotu bazeia ba pedidu ne'ebe hato'o husi parte defeza arguidu nian. Maibe tanba advogadu ne'e

dehan katak husi parte sira nian sei la presiza tan ona atu rona testemuñas sira ninia depoimentu iha julgamentu laran, nune'e Tribunal husu deskulpa barak ba testemuñas sira no haruka atu sasin Pe.Geovanio bele sai husi sala julgamentu no fila fail uma hodi halao ninia moris hanesan baibain.

Haree ba situasaun ne'ebe labele permiti ona juiz sira hodi bele halao fali julgamentu iha laron ne'e tanba partisipantes hotu iha julgamentu ne'e hahú hatudu reaksaun maka'as hasoru desizaun Tribunal nian ne'ebe dehan katak sira labele rona depoimentus husi sasin sira ne'ebe notifikadu ona, liu-liu ba Pe. Giovanio hafoin partisipantes sira direktamente husik tiha sala julgamentu hodi lao sai ba liur. Parte tribunal liu husi juiz koletivu ne'e decide atu suspende tiha julgamentu ne'e suspende tiha no sei ba hahú fail julgamentu ne'e iha laron tuir mai ho sasin sira ne'ebe la hanesan.

JSMP hola konkluzau katak fallansu ne'e mosu tanba laiha komunikasaun diak entre parte tribunal no parte defeza nian ne'ebe kaer kazu arguidu Rogerio Tiago,Cs ne'e. Tanba, antes ne'e parte tribunal nian fo hatene ona ba parte defeza nian atu bele hato'o ninia testemuñas atu bele ba hato'o sira ida-idak ninia depoimentus iha julgamentu judicial nia oin. Parte defeza nian ne'ebe lidera husi Paulo dos Remedios ne'e hato'o testemuñas sira ninia naran ba Tribunal. Maibe to'o ikus sira rasik maka rejenta fali sasin sira ne'ebe nia hato'o tiha ona atu bele sai sasin iha julgamentu Tribunal nia oin.

JSMP rekomenda ba autor tribunal sira: juiz, defeza no prokurador ou liu husi oficial justisa atu bele halao komunikasaun intensive ho parte sira ne'ebe temi tiha ona ne'e atu nune'e to'o ikus problemas hanesan ne'e labele mosu fali iha tempu futuru no labele hamosu fali kestaun ou perguntas ba sociedade konaba sistema judicial nian iha ita nia Nasaun ne'e. Sistema judicial nian iha Timor Leste ne'e lao normal ona ka seidak? Tanba ho akontesimentu hanesan ne'e sei bele halakon povu nia fiar ou kredibilidade sociedade nian konaba sistema judicial Timor Leste nian ne'ebe oras ne'e ita haree atu hahú lao dadaun ona ba etapa purifikasaun nian iha tempu futuru. Lós duni katak pozisaun nu'udar advogadu ou defensor tenke defende interese klientes sira nian. Bele halao nune'e, maibe tenke koordena halo didiak atu labele hamosu fali fallansu hanesan ne'e. JSMP haree katak buat ida mosu tanba laiha koordenasau diak iha partes sira, liuliu koordenasau diak entre arguidu liu husi ninia defeza ho ema hirak ne'ebe atu hato'o ba tribunal nu'udar testemuña ba kazu alegasaun fahe kilat ba populasau sivil ne'e.

Atu hetan informasaun tan, bele kontaktu:

Maria de Vasconcelo

Acting Director, JSMP

Telephone: 332 3883

Email: vasconcelosmerry@yahoo.com